


PAMFLET

713







2  
a

2



Sendt-brief,  
**Des Prince van Parme**  
aen Borgmeesteren / Schepenen / en Raedt  
der Stadt van Antwerpen : Widsghaders aenden  
Vreeden-Raet ende den Gulden der seluer Stadt.'

Met de Antvvoorde  
Der voorsz Heeren Borgmeesteren / Schepenen / Tre-  
sorsiers / Gentmeester ende Raedt / op den voorsz Sendt-brief /  
met ghemeyn goetduncken ende bewillinghe  
vande Leden der Stadt voorsz.



TOT DFLF,  
Op Aelbrecht Hendricxz. na de Coppe van  
Antwerpen. M. D. LXXXIIII.


713  
d.







Alexander Prince van Parme ende van Plaisance,  
Lieutenant, Gouverneur ende Capiteyn  
Generael.

 **S**eer lieue ende wel-beminde / De lang-  
duericheyt van dese Inlandscche oorloghe ende  
verstropinghe / de welcke het landt daer door  
heeft gheleden / hebben v lieden ghenoech doen  
verstaen / ende als metten vingher aenraecken /  
hoe luttel ghylieden ghehouden zijt inden ghe-  
nen die daer af oorsaeck gheweest zijn / ende die om haer bewe-  
ginghen en eyghen nuthet geboordert hebben het bederf van  
het arm volck. Ende en is niet sonderlinghe van noode v lieden  
boor te stellen allen tghene gheschiet is / sedert het beghinsel van  
dese beruerten / aenghemerct dat de meest onwetende ghenoech  
ghewaer gheworden is / dat het boornemen vanden autheurs  
van dese oorloge niet en is gheweest tot het ghemeen welbaren  
ende ruste / maer alleenlick daer toe dwelck het eyghen vā hare  
seer schadelijcke begheerte was raeckende. Want so verre men  
begint hare daden te ouerdincken / salmen ten eerste bebinden /  
dat wylen Orangen noyt anders gesocht en heeft dan verwer-  
ringhe van alle dinghen / sonder opt eenighe sorghe ghehad te  
hebben / om een vanden steden / die den leggher vanden Coninck  
mijnen Heere belegghert ende verouert heeft / te ontfletten. Het  
selfde machmen segghen vande Fransosen / daer af ghylieden  
goede ghetuyghenissen condit gheuen / hoe sy ghemeynt hadden  
met uwe huyfrouwen ende kinderen te handelen / in verghel-  
dinghe van soo veel eeren die ghy gepoocht hebt hen te bewij-  
sen. Ende nademael het Godt nu beliest heeft / den eenen ende  
den anderen van dese werelt te roepen / ende dat ghylieden daer  
door ghenoech verstaet de verminderinghe van uwe sterckte /  
en ter ander zijden de groote macht van uwen Coninck / met de  
gheluckighe wtcomsten die Godt den Schepper van daghe te  
daghe hem verleent / soo soude het nu boortaet tijdt zijn / dat ghy  
oplicht naemt op v eyghen salicheyt / ende op het welbaren van  
v eyghen volck / met soo veel onghelucken ghedronghen ende  
smringht zijnde / twelck ten lesten ghedwongen sal wesen daer



onder neder te vallen/het welcke oorsaecke is/ dat wy/beweecht  
zijnde door een sonderlinghe gheneghentheyt die wy totten lan-  
den draghen/soo omme de plaetse van waer wy ghesproet zijn/  
als omme de gunsten die wy in onse jonckheyt aldaer hebben  
ontfanghen/ hier te vooren de moeyte ghenomen hebben van v  
lieden met onse vrienden voor te dragen/so aen v lieden int beson-  
dere / als aen den anderen steden ende landen int ghemeyn / al-  
welcke middels als ons / met God ende in onsen ghewisse / doch-  
ten ghenoechsaem te wesen / omme het landt wederomme in  
brede en gherustheyt te stellen. Maer alsoo wijlen Orange/en-  
de andere die niet anders en sochten dan door het bederff bande  
landen/ende het bloet van de arme onnoosele menschen/aen hen  
te trecke de heerlichheyt ende heerschappye bande voorschreuen  
landen/ onse voorschreuen vrienden hebben archghelijck opghe-  
houden ende verdupstert/ hebben wy wel ghewilt / voor de leste  
reysle / v lieden noch eens desen te schrijven / ende te bidden met  
alle herticheyt ende ernst ons moghelijck zijnde/ dat ghylieden/  
medelijden hebbende met uwe hupsvrouwen/kinderen / ende v  
verlatene Vaderlandt/ de ooghen van uwe ghedachtenisse eens  
wilt slaen op de ruste ende voorspoet die een pghelijck hier te  
vooren ghenooten heeft / onder de ghehoorsaemheyt van zijne  
Maesteyt / ende ter andere zijden op het wterlijcke bederf / toe  
welcke dit landt teghenwoordelijck ghebracht is / het welcke  
nochtans (soo verre men in dese oorloghe volherdt) van daghe  
tot daghe meer ende meer sal toenemen/ tot den onderste gronde  
ende lesten stip toe. V lieden ooghe voortaen sluptende voor de  
leughenachtighe voorslagginghen ende aengheuen van de ghe-  
ne die v houden ende boeden in dese dwalinghe ende wantrou-  
we bande goetheyt en oprechticheyt vanden Coninc uwen na-  
tuerlicken Prince/de welcke nochtans so seer groot is/ dat/ hoe-  
wel de inurten zijn seer swaer en atroce/hy nochtans daeromme  
niet en laet v lieden eene geheele verghetinge aen te bieden. En  
als ghylieden sult willen in handelingh comen / naer wtwijlen  
der begheerte / die meer als de helft van de borgherije van Ant-  
werpen daer toe heeft/volgende tghene wy verstaen byden ver-  
wettinghen die ons daghelick ende tallen uren daer af van alle  
zijden ghedaen worden/belouen wy v lieden / dat wy van onser  
zijden



zijden sulcx ouer een comen sullē / in allen tghene dat ghylieden  
eerlicken ende redelick sult moghen voordragen / dat ghylieden  
metter daedt sult vernemen / dat het ghene ons beweecht / meer  
is eene ware ende vaderlicke gheneghentheyt / die wy draghen  
tot v eyghen welbaren ende ruste / dan eenighe nut oft eyghen  
beweghentheyt / oft wantrou bande wtcoemste vā onse aenla-  
ghen / daer ghy liede oorsake sult wesen / by soo verre ghy v noch  
boorder hardneckich en obstinaet wilt bethoonen / van de con-  
ditiën van uwe versoeninghe seer te verargheren. Protesteren-  
de daerenbouen / dat wy egheen oorsake en zijn van het verghie-  
ten van soo veel onnoosel bloets / en min bande ongelucken die  
daer naer boorder sullen volgen. En ten eynde niemant onwe-  
tende en zy van onsen goeden wille / noch van de aanbiedinghe  
die wy v lieden doen / schrijuen wy brieuen bandē seluen inhou-  
den / aen dien banden grooten Raedt / ghenaeint / den Breden  
Raedt / ende andere Gulden / met bede aen Godt / dat hy het her-  
te banden ghenen wil aenroeren / die meest onder v lieden ver-  
moghen / sulcx dat het welbaren ende ruste / die ghylieden daer  
wt moecht verwachten / coets volgen mach / also wy selue ver-  
hopen. Waermede wy Godt bidden sullen / v lieden / Seer lie-  
ue ende wel beminde / te nemen in zijne heplighe ende weerde  
hoede.

Wt den Legher tot Stabroeck desen xijf. Nouembrijs / 1584.  
Onderteeckent Alexandre. Ende leegher Garnier.

Het opschrift / Aen onse seer lieue ende wel-beminde Borg-  
meesteren, Schepenen ende Raedt der Stadt van Antwerpen.

M iij

Ant-





Antvwoorde,



In Heere/

De vrien van uwe Hoocheyt banden rij. deser  
Maendt/respectiuelijck gheschreuen aen de Wet-  
houderē/aen de Dekens van de Guldē/ ende aen  
den Breden-Gaedt deser Stadt/zijn alhier ghe-  
handtrept ende ghelesen / soo by onse Collegie/  
als by allen den Leden der Stadt / inden Bree-  
den-Gaedt der seluer/tot desen eynde wtduchelijck vergadert/ en  
hebben eendrachtelijck gheraeden geuonden voor antwoorde uwe  
Hoocheyt in alder eerbiedinge te berthoonen/dat de vermaninghe  
die de selue ons doet/dat wy ons ooge soudē slaen opt voornemen  
d'welck de ghene gehadt hebben die ons dese inlandtsche oorloghe  
hebbē geboordert/ons seer aengenaem geweest is/de selue nemen-  
de als spruytende wt eene goede ghenegentheyt die uwe Hoocheyt  
heeft van te sien dese Landen ghebracht te sijne tot eenen beteren  
staet/gelijck wy t'selue insghelijcx van gantscher herten begeeren  
souden:waer voor wy uwe Hoocheyt seer ootmoedelijc bedancken.  
Maer (onder verbeteringhe der seluer) dunckt ons dat sy niet vol-  
comelijck en moet onderricht wesen van het waerachtich begin-  
sel ende oorspronck vande boorsejde oorloghe: Mengesien dat het  
alle de weerelt kennelijck is/dat wy teghens onsen wille/ ende tot  
onsen wterlijcken leedtwesen ghedwonghen zijn gheweest/deur de  
beleydinghen ende listicheden vande ghene die om het eyghen van  
hare begeerten/ ende om binnen dese Landen een heerschappije te  
beuestigen/inde daet meer wesende als Coninclyck/ hebben onder-  
r'decksel vande Religie/ deur middel van sijnscche informaticien en  
ondersoeckingen/gheboordert byde Maesteyt des Coninc(aende  
welcke / ghelijck insghelijcx aen alle de hooghe ende machtighe  
Princen zijne voorszaten/dese Landen altyt berthoonen hadden alle  
ghetrouwe ende volcomen gehoozsaemheyt/ oock soo groote als  
opt volck ter werelt berthoonde aen zynen Prince) op te richten in  
tghemeyn teghens alle de Inwoonderen des Landts van alle  
qualiteyt/staet/ouderdom/man oft vrouwe / de alder schroeme-  
lijcxste ende wreestste veruolghinghen die opt ghehoort oft gheplo-  
ghen zijn gheweest / verghefelschapt met ontallijcke confiscaticien  
van



van goeden/ proscriptien/ ballinckschappen / ende bloedighe execu-  
tuen/ niet vier/ sweerden/ ende galgen/ tegens alderhande soorte  
van vrome/ arme ende onnoosele menschen / de welcke sonder opt  
ghehoort te zijne in haer rechtueerdighe ende wettelijcke verant-  
woordinghen/ veroordeelt zijn gheweest/ sonder hen ander misdaet  
op te legghen/ dan dat sy hen vergaderden omme Godt alleen te  
bidden ende aen te roepen door den eenighen Voorsprake ende  
Middelaer Jesum Christum/ volgende zijn Woort ende Ghebodt/  
ende daer naer teghens de handelinghen/ accoorden/ edicten/ so-  
lemnelijcken ghemaect/ ende wtghegheuen by mijn Vrouwe van  
Parme / Moeder van uwer Hoochept / met bewillinghe vanden  
gheheelen Raedt van Staten/ ende namentlyck onder den naem/  
Authozithept/ macht ende seghel vanden Coninck/ zijn ghevolcht  
de tyrannighe executien van wijlen den Hertoghe van Alue / ende  
den Spaengiaerts / niet alleenlyck teghens het arm volck / maer  
oock teghens de voornaemste Begeerders/ Heeren/ Baenreheeren/  
ende Edelen des Lants (van welcke zijne Maiesteyt de alder mer-  
ckelijckste diensten hadde ontfanghen) met openbaer inbrekinghe  
van alle rechten/ ghewoonten/ ende priuilegien/ by alle de Princen  
deser Landen beswozen / omkeeringhe vande Rechterstoelen / de  
welcke in handen ghesteldt zijn gheweest vanden ghenen die naer  
wtwijsen vande oude Wetten ende Priuilegien daer toe gheensins  
en mochten ghenomen worden/ bouwinghe ende oprichtinge van  
verscheide Casteelen/ onverdzaeghelijcke/ onbehoorlijcke ende on-  
weghelijcke schattinghen ende exactionen/ ende van eene geheele on-  
derdruckinghe van alle de vryheden des Vaderlandts. Alle welcke  
saecten claerlyck gheschiet zijnde teghens alle ghewoonlijcke vrom-  
me van rechte/ egheen ander vrycht en hebben connen voortvri-  
ghen/ dan dese deerlycke oorloghe/ de welcke ons daer naer toege-  
bracht heeft den Suntbloet van alle quaet ende ellenden.

Waeromme wy uwe Hoochept bidden/ te willen ghelooouen/ dat  
wy dese oorloghe noyt deur herten-lust ende begeerlijchept aenge-  
banghen en hebben / ende namentlyck niet deur eenighe byzen-  
ginge en persuasien van wijlen mijnen Heere de Prince van Bran-  
gien/ (hoogher ghedachten) de welcke alhier niet en is ghecomen  
gheweest/ dan ter grooter ende ernstiger begheerte vande Staten/  
ende dat soo wel vande Prelaten als vande Edelen ende Steden/  
die oock egheen authozitept ghebruyckt ende aen sich ghenomen  
en heeft / dan de ghene de welcke hem met groote importuniteyt  
ende ouerdringinghe is op gheleght gheweest / maer dat het ghe-  
weest is een naecte/ wterlycke en onnijdelycke nootsaekelijcheit  
ende ghewelt/ dwelck ons ghedwonghen heeft de wapenen aen te  
nemen:



nemen: egheen binck ter weereit meer begheerende / dan deur een  
gheluckighe vrede en alghemeyne ruste daer af haestelijck een eynde  
te moghen sien.

**D**'welcke oorsaecke is / dat wy uwe Hoocheyt seer ootmoedelijc  
bedanken vande onderhandelinghe die de selue ons aanbiet omme  
daer toe te geraecken / niet connende genoegh prijsen en louen zijne  
grootmoedicheydt / van dat sy / hebbende laten blijcken bouen alle  
d'andere Gouverneurs zijne voorszaten / van zijn vermoghen ende  
vroomheyt in t'stuck vande wapenen / ons oock so goedichlijck aen  
biedt de selue met soeticheyt ende goedertierenheyt te willen ver-  
gheselschappen / wesende voorszwaer een deucht de alderprijselijckste  
diemen soude moghen vinden / besundere by den grooten Vorsten  
ende Coninghen. Ende voornamentlijck hebbende ouer eenighen  
tijdt dit gheboelen ghehadt van uwe Hoocheyt / indien wy hadden  
connen verstaen dat de selue volcomelijck ghemachticht ende ghe-  
authoriseert waere gheweest van ons te moghen toelaten / t'ghene  
de selue naer zijne wijsheyt ende goet oordeel soude bekent hebben  
nootelijck te wesen tot beuestinghe van eenen goeden en sekeren vrede /  
wy en souden nemmermeer so langhe verthoeft hebben gehad  
van ons te werpen tusschen zijn armē / ende namentlijck en soudent  
in egheen andere bespreken oft conditien hebben willen treden /  
dan den ghenen die uwe Hoocheyt selfs dooz zijn voorszinnicheyt /  
verbuecht met soetheyt ende goedertierenheyt / soude gheoordeelt  
hebben redelijck te wesen / als connende gheensins twijfelen / oft de  
selue en soude gheerne ghevolcht ende den Coninck gheraeden heb-  
ben te volghen de voerstappen ende doozluchtighe ende prijselijc-  
ke exempelen van andere groote Coningē ende Princen zijne voorz-  
saeten / de welke in ghelijcke saecke / naerder ghegrondt hebbende  
de wortel van t'quaet / hebben vernomen onmoghelijck te zijne  
daer af tot de ghenefinghe te comen / omme heure ondersaten te  
handthauen in eenen sekeren vrede ende vaste ruste / gebuecht met  
haeren getrouwen plicht ende onderdanicheyt tot hare Ouersten /  
sonder hen toe te laten de byjheyt van henne Religie / vande welcke  
ze te vreden waren ende aanboden tallen tijden reden ende reken-  
ninghe te geuen / aen Rechters niet suspect noch partijdich wesende /  
ende dat in alle byjē ende wettinge vergaderinghen ende con-  
cilien / hebbende ten aensien van dien beuonden het hoochste ende  
beste remedie ende raedt teghens alsulcken quaet te wesene / dat sy  
goedertierentlijck soudent toe staen ende verwilligen de rechtuer-  
dighe ende billijcke versoeken vā henne ondersaten / so tselue bljct  
byde exempelen van wijlen de onuerwinnelijcke ende hoochmachi-  
ghe Kēpsen van seer hooger ghebachtenisse Carolus de vyfde /  
Ferd-



Ferdinand ende Maximiliaen in Duytschlandt / en de alder Chri-  
stelijckste Coninghen van Franckryck / ende die van Polen inden  
landen van heure ghehoorsaemheyt.

Maer alsoo deur seer menichfuldige getuygenisse / en namentlicke  
deur vele verclaringen by uwe Hoocheyt ghedaen / wy sekerlycken  
onderricht zijn geweest / dat het geensins in zijnder macht en was  
eenichsins op dese sake te disponeren: Het welc nochtans den eeni-  
ghen gront is / ende de voornaemste herre oft asse omme dwelck het  
stuck vande vrede oft van de oorloge is draepende / ende dat meer  
is / dat de Coninc sich beuindende der Inquisitie van Spaengien /  
en den gheboden des Paus van Roomen onderworpen / de macht  
oft vrydom niet en hadde zijn ondersaten (Christenen wesende) te  
vergunnen tghene den Paus ende vele Princen van Italien gheer-  
ne den Joden ende Turcken toelaten: en sonder twelcke het teene-  
male onmoghelijcken is een gheduerich verbolch van allerhande  
soyten van ellenden handen volcke af te wenden. Wy ons beuin-  
dende blyuen alle hope van immermeer yet te moghen verwerue /  
dwelck ons eenighe verskerde ruste soude moghen aenbrengen /  
de selfste noot die ons ghepoort hadde dese oorloghe aen te nemen /  
heeft ons oock bedwonghen de selue te volghen / omme ons tegens  
eene soo onrechtueerdighe verdrukkinghe te beschermen. En naer  
bele ontallijcke seer ootmoedighe supplicatien / beden / verthoonin-  
ghen / ende protestatien / so by gheschryfte / als door ghesanten naer  
Spaengien afgeveerdicht: Ende namentlijck / naer verscheyden  
tusschensprekinghe ende intercessien van vele Christelijcke Conin-  
ghen ende Princen binnen twintich jaer herwaerts ende meer / te  
vergheefs ghedaen ende verbolcht / hebben wy ten lesten bedwon-  
ghen gheweest onse toevlucht te nemen aen wtthemische Vorsten.  
Ende teghenwoordelijck siende de groote ende wtneemende wijs-  
heyt / gherechticheyt / ende maticheyt / mette welcke de alder Chri-  
stelijckste Coninc van Franckryck zijn ondersaten / soo wel van  
d'een als dandere Religie in vrede ende ruste onderhoudt: ende ons  
beuindende ten wtersten ghenootsaert ende bedwonghen als voo-  
ren / en connen wy uwe Hoocheyt niet verswighen / dat alle de ghe-  
binteerde ende bondtplichtighe Prouincien met ons / met een gene-  
rael ende eendrachtich besluyt hen alreede aen zijne voorsz Maes-  
teypt van Franckryck verbuercht hebben / de selue seer ootmoede-  
lijck biddende / onse sake in handen te willen nemen / ende ons in  
zijne bescherminghe ontfanghen als zijne ondersaten / omme ons  
teghens eene soo wterlijcke strafheyt ende onmenschelijcheyt voor  
te staen ende te beschutten. Waer op zijne Maesteyt ons soo goe-  
dertieren ghehoort en so goede hope ghegheuen heeft / dat / volghen.



de de verbintentisse met de welcke wy aen hem solemnelijck en ghe-  
neralijck zijn verbonden/ het in onse macht niet meer en is/ in eent-  
ghe onderhandelinghe te treden/ de welcke (hoe luttel het ware) on-  
se aanbiedinghe en beloften eenichsins souden moghen hinderlijck  
zijn ende prejudicieren/ sonder te vallen in eene rechtueerdighe bla-  
matie ende lasteringhe/ van te wesen de alder lichtveerdichste ende  
ondancbbaerste die de aerde soude moghen draghen.

Ter andere syden oock/ alsoo wy maer een lidt en zijn van de ge-  
neraliteyt/ ende dat wy by solemnelen eedt ons hebben verplicht/  
in egheene communicatie oft handelinghe van vrede te treden/ son-  
der een alghemeyne bewillinge en goetbinden van d'andere gheb-  
nieerde landen/ en hebben wy geene macht/ al hadden wy daer ooc  
begeerte toe/ de aanbiedinge van uwe Hoocheyt aen te nemen/ son-  
der al vozen van henlieden henne inwillinge ende toestaen/ midts-  
gaders oock die van zijne voorszeyde Maesteyt van Brancryge ver-  
crege te hebbē/ welcke is de redene/ waeromme wy uwe Hoocheyt  
seer ootmoedelijcken biddē/ dat achtervolghende dese soeticheyt en  
vaderlijcke goedertierenheyt die ons de selue soo goedichlijck aen-  
biet/ der seluer belieue niet quaeet te bindē/ dat vooz en al eer in ee-  
nige handelinghe te treden/ wy naer wtwijzen vā onse verbintenis-  
se/ de bzieuen van uwe Hoocheyt seyndē aende voorszeyde gebnieer-  
de prouincien/ en met henne approbatie en goetbinden wy de selue  
oock voozdragen aen zijne voorszeyde Maesteyt van Brancryck.  
Ten eynde/ dat/ aengemerckt der seluer belieft heeft ons soo seer te  
vereeren / als sich verstaen te hebben tot onse seer ootmoedighe  
elachten (de welcke elders so onweerdichlijcken verworpen zijn ge-  
weest) wy niet en doen sonder zijne oozlof ende toelatinghe/ omme  
zijne Maesteyt niet te gheuen rechtueerdige oozsaecke/ van ons te  
blameren ende lasteren als bedriegers/ lichtueerdige ende ondanc-  
bare menschen.

Belangende de protestatie die uwe Hoocheyt belieft te doen int  
eynde zijns bziefs / willen wy wel gheloouen/ dat de selue gheen  
oozsaecke en is van de wtsorpinghe van so heel onnoosels bloets/  
noch vande ongelucken die daer naer souden mogen volghen: aen-  
gemerckt den oozspronck van dese oozloghe van elders hercoemt.  
Maer wy bidden ooc uwe Hoocheyt seer ootmoedelijckē/ te willen  
bemercken/ dat wy van onser zijden in gheenderhande wijse desen  
aengaende beschuldichten moghen wesen/ ghemerckt wy niet van  
defensie oozloge/ oft tot bescherminge dienende/ en vueren/ en tot  
geen ander saecke en trachten/ van ons/ met hupsvrouwen en kin-  
deren/ int leuen te onderhoudē/ ende inde vryheyt van onse gewis-  
sen



ken ende consciëntien / ende daenroepinge des naems Godts deur  
onsen eenighen Salichmaker ende Middelaer Iesum Chzistum.  
Ende dat daeromme wy van onser syden van alle bloetstoztinghe  
seer geerne een eynde maecten souden / so verre het uwe Hoocheyt  
insghelijcx belieft de metter daedt te bewijzen dese goedertierenheyt  
ende soeticheyt / de welke haer belieft ons met zynen brieuen te be-  
loeuē / doende de selue van zijnder zijden gelijckelijckē ophouden /  
ten eynde wy deur de bewijsinge van dit begintsel / oordeelē mogen  
vā de verskertheyt vā alle de reste. Biddende uwe Hoocheyt voor  
t'leste / te willen geloouē dat wy zijne deuchden hooch achten ende  
beminnen / ende begeeren van gantscher herten der seluer seer oot-  
moedigen dienst te bewijzen / in alle tghene dwelcke onse eere / eedt /  
ende consciētie (de welke wy bidden voor Godt alleen te mogen  
bewaren) ons eenichsins sullen mogen toelaten. Hier mede

Mijn Heere / cussende seer ootmoedelicken de handen van uwe  
Hoocheyt / bidden God almachtich dat hy der seluer verleene tge-  
ne haer alder salichste is. Dit Antwerpen desen xxiij. dach van  
Nouember / 1584.

#### **Ower Hoocheyt**

Seer ootmoedighe ten dienste /  
Borgemeesteren / Schepenen / Tresoriers / Rent-  
meester ende Raedt der Stadt van Antwerpen /  
hier op gecommuniceert hebbende metten ande-  
ren Leden indē Breeden-Raet vergadert / mid-  
gaders metten Gulden der voorszeder Stadt.

Ter ordonnantie vanden seluen /  
Onderteeckent B. Berkecom.

Het Opschrift was

Aen zijne Hoocheyt.





Unterzeichnet: E. Beckmann

ကုမ္ပဏီလီမိတက်

Amesbury, Mass.



